

# 1 TESALONICENSES

---

## Saludo

**1** <sup>1</sup>Núa Pablo, Silvano yáapicha, áibaalí ípidenéeri Silas, Timoteo yáapicha nacái nutànàacué pirí cuyàluta, píacué wéenánái yebáidéeyéica Jesucristo itàacái Tesalónica iyacàlená mìnánái, píacué iyéeyéica abédanamata Wáaniri Dios yáapicha, Wáiwacali Jesucristo yáapicha nacái. Wawàwalicué pía. Wía apóstolca, wasutáca Dios ícha pirípinácué imàníinápinácué pirí cayábéeri mawèníri iyú, imàacáanápínácué pìyaca matuíbanáiri iyú nacái.

## El ejemplo de fe que daban los de Tesalónica

<sup>2</sup>Macái imanùbaca wasutácaalí Dios ícha pirípinácué, wàaca irí cayábéeri pìwalicué macáita. <sup>3</sup>Wàaca Wáaniri Dios iríwa cayábéeri mamáalàacata píibaidacáinácué Dios irípiná cachàiníri iyú peebáidacáinácué Jesucristo itàacái. Wáalía nacáíwa pìyúudàacuéca áibanái manuísíwata cáinináacáinácué piicáca Dios. Wáalía nacáíwa picùacuéca manuísíwata Wáiwacali Jesucristo yàanàanápíná àniwa, íná yéewa pìideniácuéca pìuwichàanáwa matuíbanáiri iyú idècunitàacá namànicuéca pirí báawéeri ìwalíise yái peebáidáanácuéca Jesucristo itàacái. <sup>4</sup>Píacué wéenánáica, cáininácuéca Dios iicáca pía. Wáalíaca nacáíwa Dios idéca yeedácuéca pía yàasu wenàiwicacaténácué pía. <sup>5</sup>Wacàlidacaalítécué pirí Jesucristo iwasàaca wenàiwica Dios yàasu yùuwichàacáisi ícha, càmítaté wacàlidacáitacué piríni yáawami tàacáisi iyú meedá, néese wacàlidacatécué piríni Espíritu Santo ichàini iyú, wáalíacaté nacáíwa báisíiri iyú báisícani yái tàacáisi wacàlidéerica. Píalíacué nacáíwa amaléeri iyú wàyacaté machacàníri iyú pèewibàa, wayúudàacaténácué pía, íná píalíacuéwa wacàlidacaté pirí Dios itàacái báisíiri iyú.

<sup>6</sup>Wía apóstolca, wáaliacawa Dios yàasunáica píacué, bàaluitéainá pidàbacué pìyaca machacàníiri iyú càide iyúwa wáasáidáanátécué pirí, càide iyúwaté nacái Wáiwacali ìyáaná. Yá peebáidacatécué Jesucristo itàacái casíimáiri iyú, càide iyúwaté Espíritu Santo imàacáanácué casíimáica pía, éwitaté áibanái càimíiyéi yeebáida nàuwichàidacáanítacué pía báawanama peebáidacáinácué Jesucristo itàacái. <sup>7</sup>Càita píasáidacuéca áibanái irí càinácaalí iwàwacutáaná neebáidaca, macáita yeebáidéeyéica Jesucristo itàacái, ìyéeyéica Macedonia yàasu cáli íinata, Acaya yàasu cáli íinata nacái. <sup>8</sup>Wáaliacawa pimàacacué madécaná áibanái náaliacawa Wáiwacali itàacái ìwali, càimírira abéta níara iyéeyéica Macedonia yàasu cáli íinata, nía nacái iyéeyéica Acaya yàasu cáli íinata, néese macái cáli imanùbaca manùbéeyéi wenàiwica náalíacué piináwaná ìwali. Náaliacawa peebáidáanácué Dios itàacái, íná càmita iwàwacutá wacàlidacuéca nalí piináwaná ìwali. <sup>9</sup>Néese, níata icàlidaca iyaca walí piináwanácué ìwali, íná náaliacawa wapáchíanácué pía bàaluité, pitàidacatécué wía cayába, péemiacatécué nacái wàasu tàacáisi. Piyamáidacatécué píaca ídolo icàaluíniná, níara cuwáinái yéenáiwanáca, yá pimàacacatécué píawawa cáuri Dios irí, yái báisírira, peebáidacaténácué itàacái, píibaidacaténácué irípiná nacái. <sup>10</sup>Nacàlidaca nacái walí picùacuéca Jesús yàanàaca chènuníise àniwa, yái Dios lírica, Dios imichàidéericaté yéetácáisi íicha. Yácata Jesús iwasèerica wía Dios yàasu manuírí yùuwichàacáisi íicha, yái yùuwichàacáisi yàanèripináca èeri imáalàacaalípináwa.

### El trabajo de Pablo en Tesalónica

**2** <sup>1</sup>Iná píacué wéenanáica píalíacuéwa Dios imànicatécué pirí cayábéeri wapáchiaacaalícué pía bàaluité. <sup>2</sup>Péemiacatécué waináwaná ìwali, wía apóstolca, ipíchawáiseté wàanàacué píatalé, yáté Filipos iyacàlená minanáí namànicaté walí máini báawéeri, natàanicaté nacái wàwali báawéeri iyú idècunitàacá nàuwichàidaca wía ìwalíise yái wacàlidáanáca Jesucristo itàacái. Quéwa Dios iyúudàcaté wía wàanàacaténáté pìyacàle nérécué wacàlidáanápínácué piríni macàaluínináta, yái tàacáisica íiméerica Jesucristo iwasàaca wenàiwica Dios yàasu yùuwichàacáisi íicha, éwitaté áibanái nàuwidécáaníta namànica wía manuísíwata. <sup>3</sup>Càmítaté wacàlidacué pirí cachìwéeri tàacáisi, càmita nacái watàanícué pirí wachìwáidacaténácué pía meedá, weedácaténácué píicha plata. <sup>4</sup>Néese Dios yáalimáidacaté iicáwa wía asáisi wáibaidacaalí irípiná machacàníiri iyú, wía apóstolca.

Néese idécanáamité cayábaca Dios iicáca iyúwaté wáibaidáaná irí, yá ibànùacaté wía wacàlidáanápínáté yáí tàacáisi ímérica Jesucristo iwasàaca wenàiwica Dios yàasu yùuwichàacáisi ícha. Iná yéewa wacàlidaca wenàiwicanáí iríni. Càmita wáalimáida wasímáidacáita wenàiwica meedá wàasu tàacáisi iyúwa, néese wacàlidaca Dios itàacái càide iyúwa Dios iwàwáaná, yáí Dios yáalírica wawàwa. <sup>5</sup>Píaliacué nacáíwa càmitaté wachìwáidacué pía cachìwéeri tàacáisi iyú càide iyúwa èeri minanáí iwàwáaná yéemiaca. Càmitaté wamàni càì weedáanápínacué pícha cawèníri. Càmitaté nacáí wamàni wawàsi ibàacanéeri iyú weedácaténacué pícha plata. Càité wàyacué pèewibàa machacàníri iyú Dios iicá. <sup>6</sup>Càmitaté wawàwa wenàiwica naicáca wía iyúwa máiníyéica cayába áibanáí ícha. Càmitacué wacutá pícha càiri, áibanáí ícha nacáí, ibatàa abéeri piná, éwita Dios imàacacáníta walí cáimiétacanéeri íbaidacalési, wía apóstolca. Càité nacáí, éwita Dios imàacacáníta walí íiwitáisewa wachùuliacaténacué pía cachàiníri iyú, càicacáníta càmitaté wamàni càì. <sup>7</sup>Càmitaté wachùuliacué pía cachàiníri iyú, éwita Cristo yàasu apóstolcáaníta wía. Néese watàanícacéué pirí éeréeri iyú. Wamànicacéué pirí càide iyúwa inanáí udàwinàacaalí uénibewa, ucùa nacáí nía cáininéeri iyú. <sup>8</sup>Càité nacáí cáinináca waicácuéca pía íná wawàwacaté wacàlidacuéca pirí Dios itàacái cayábéeri, yá wáibaidacaté macáí wachàini iyúwa wayúudàcaténacué pía. ¡Yá wacàlidacatéué pirí Dios itàacái mamáalàacata cáininácáiná waicácuéca pía! <sup>9</sup>Píacué wéenánaica, píaliacuéwa wáibaidacaté wacáapi iyúwa mamáalàacata cachàiníri iyú wawèniacaténáté wayáapínáwa, wàyacaalíté pèewibàa. Càmitaté wawàwa wáinataléca pirícuéni, íná wáibaidacaté èeríapinama, táiyápinama nacáí ipíchanacué wacutáca pícha wayáapínáwa idècunitàacá wacàlidacatéué pirí Dios itàacái.

<sup>10</sup>Píaliacuéwa amaléeri iyúni wàyacatéué pèewibàa machacàníri iyú piicápinacué, mabáyawanéeri iyú nacáí Dios iicá. <sup>11</sup>Píaliacué nacáíwa wàalàacatéué pía, wamichàidacatéué píiwitáise, wachàiniadacatéué piwàwa, píacué abéechúanaméeyéica càide iyúwa nániri cayábéeri íiwitáise imàniiná yéenibe iríwa. <sup>12</sup>Wàalàacatéué pía pimànínápínacué càide iyúwa iwàwacutáaná Dios yàasu wenàiwica imànica, yáí Dios imáidéericuéca pía icùacaténacué pía iyúwa Picuèriná, pìyacaténacué nacáí Dios icamaláná mèlumèluíri iricu chènuniré.

<sup>13</sup>Iyaca áiba wawàsi nacáí wèerica Dios irí cayábéeri ìwalíise mamáalàacata: Bàaluité péemiàcanáamicué wacàlidaca pirí Dios itàacái, yáté peebáidacuécani píaliacáinátéwa Dios itàacáicani báisiiri

iyú, càmita càide iyúwa wenàiwica itàacái meedá. Báisíta Dios itàacáicani, iwàlisàidéericuéca píiwitáise piwàwalicuísewa, píacué yeebáidéeyéicani. <sup>14</sup>Iná píacué wéenánáica, peebáidacáinácúé Jesucristo itàacái, ínáté ìwaliíse pìasu cáli néeseéyéi nàuwichàidacatécué pía, níái càmfíyéica yeebáida. Yá piùwichàacatécuéwa càide iyúwa Dios yàasu wenàiwica nàuwichàanátéwa, níara yeebáidéeyéica Cristo Jesús itàacái Judea yàasu cáli íinata, bàaluitécáiná néenánái nacái judíonái nàuwichàidacaté nía ìwaliíse yái neebáidáanáca Jesucristo itàacái. <sup>15</sup>Níara judíoca nanúacaté Wáiwacali Jesús, càide iyúwaté nàawirináimi inúanáté Dios yàasu wenàiwica profetanái icàlidéeyéicaté tàacáisi Dios inùmalicuíse. Judíonái yùuwichàidacaté wía nacái, náucaca wía nacái nàasu cáli íichawa. Càmita namàni càide iyúwa casímáiná Dios iicáca. Nàuwideca namànica macái wenàiwica. <sup>16</sup>Macái imanùbaca wawàwacaalí wacàlidaca Dios itàacái càmfíyéi judío irí, yéewacaténa Jesucristo iwasàaca nía nacái Dios yàasu yùuwichàacáisi íicha, judíonái càmita namàaca wacàlidaca Dios itàacái càmfíyéi judío irí. Càita máiní namànica nabáyawanáwa, níái judíoca. Quéwa átata Dios yàasu yùuwichàacáisi máiníri manuíca idéca yàanàaca mawiéniré nalí, yàanàacaténa nàwali mesúnamáita.

### Pablo desea visitar otra vez a los de Tesalónica

<sup>17</sup>Píacué wéenánáica, achúmacaté wawàwa iwàwacutácáinaté wàacawa píchacué, achúma èripináté, yáté éwita càmicáaníta waicácué pía, càicáaníta wawàwalicué pía mamáalàacata wawàwalicuísewa. Iná wawàwacaté wàacawa pìatalécué máinícáinaté wawàwaca wapáchiacuéca pía. <sup>18</sup>Yáté wáináidacawa wapáchíanápináté píacué. Núa, Pablo nuwàwacaté nupáchiacuéca pía madécaná yàawiría quéwa càulenacaté Satanás imànica nuíchani, íná càmitaté núalimá nùanàaca néré. <sup>19</sup>Wía apóstolca, máiníté wawàwaca waicácuéca pía casímáicáinácúé pimànica wawàwa wacùacáinácúé wabàlùanápináwa píapicha Wáiwacali Jesucristo íipunita áiba èriwa Wáiwacali yàanàacaalípiná àniwa. Néenialípiná, imáiní casímáipináca wawàwa pìwalicué peebáidacáinácúé Jesucristo itàacái tàì íiméeri iyú! <sup>20</sup>Báisíta, wacàlidapinácúé piináwaná ìwali casímáiri iyú, pimànicáinácúé máiní cayábéeri.

**3** <sup>1</sup>Néeseté máiní nuwàwacaté nuémíaca piináwaná ìwalicué, quéwa càmitaté núalimá nùaca nupáchiacuéca pía. Càmicáinaté núalimá nuídeníaca mamáalàacata yái càmfínáca núalíawa, ínáté

nuínáidacawa nuyamáanápínátéwa abéerita Atenas iyacàlená néré. <sup>2</sup>Yáté nubànùaca wéenásàiri Timoteo yeebáidéerica Jesucristo itàacái, ipáchiacaténácué pía. Yái Timoteo abéeri wéená wía íbaidéeyéica Dios irípiná, wía icàlidéeyéica yái cayábéeri tàacáisica Cristo iináwaná ìwali. Yáté nubànùacué pìatalé Timoteo imichàidacaténácué píiwitáise, ichàiniadacaténácué piwàwa nacái, yéewanápinácué peebáidaca Jesucristo itàacái mamáalàacata tàì íméri iyú. <sup>3</sup>Nubànùacaté Timoteo pìatalécué yàalàacaténácué pía, báawacáichacué piwàwa piùwichàacái ìwalísewa, ipíchanácué piwènúadaca píiwitáisewa Jesucristo íicha. Píalíacuéwa iwàwacutáaná wàuwichàacawa càì, wía yeebáidéeyéica Jesucristo itàacái. <sup>4</sup>Càita nacái bàaluité wàyacaalítécué píapicha, yáté wacàlidacué pirí áibanái nàuwichàidáanápíná wía, weebáidacáiná Jesucristo itàacái. Siuca píalíacuéwa wadéca wadàbaca wàuwichàacawa càide iyúwaté wacàlidáanácué piríni. <sup>5</sup>Iná càmíicáináté nùalimá nuìdeniaca quirínamani, yái càmínácuéca nùalía piináwaná ìwali, yáté nubànùaca Timoteo isutácaténácué yéemíawa pía yéewanápiná nùalíacuéca piináwaná ìwali asáisi peebáidacaalícué Jesucristo itàacái mamáalàacata tàì íméri iyú. Nubànùacatécué pìataléni achúmacáináté nuwàwa nuínáidacawa piwalícué cawàwanáta Satanás yáalimáidacatécué pía piwènúadáanápínácué píiwitáisewa Jesucristo íicha. Càita Satanás iwàwa imànica yéewanápiná canáca iwèni, yái wacàlidéericuéca pirí Dios itàacái bàaluité.

<sup>6</sup>Quéwa siúcade Timoteo idéca yèepùacawa pìyacàle néesecué, yáara Tesalónica iyacàlenáca. Yá idéca icàlidaca walí cayábáanácué piináwaná peebáidacáinácué Jesucristo itàacái mamáalàacata tàì íméri iyú, cáininácuéca nacái piicáyacacawa. Idéca icàlidaca walí piwàwalíinácué wía cáininéeri iyú mamáalàacata, máini nacái piwàwacué piicáca wía càide iyúwa wawàwáanácué waicáca pía. <sup>7</sup>Iná píacué wéenánaica, éwita wàuwichàacáanítawa manuísíwata, càicáaníta wadéca wachàiniadaca wawàwawa, wía apóstolca, wéemíacáinácué piináwaná ìwali peebáidacuéca Jesucristo itàacái mamáalàacata tàì íméri iyú. <sup>8</sup>Yá wáalimá wàideniaca yùuwichàacáisi wéemíacáinácué piináwaná ìwali càmínácué piméyáawa peebáidaca Wáiwacali itàacái tàì íméri iyú. <sup>9</sup>Càmíiripínáta wayamáida wàaca Dios irí cayábéeri piináwaná ìwalísecué, yá nacái pimànínácuéca cayábéeri. Iná yéewa casímáica wía Dios iicápiná pìwalínácué. <sup>10</sup>Eeríapinama, táiyápinama nacái wasutáca Dios íicha manuísíwata imàacáanápíná waicácuéca pía watuí iyúwa wéewáidacaténácué pía mamáalàacata

iwàwacutácáinacué píalíacawa áiba wawàsi ìwali peebáidacaténacué Jesucristo itàacái tàì íiméeri iyú.

<sup>11</sup>Wía apóstolca, wawàwaca Wáaniri Dios, Wáiwacali Jesucristo nacái nayúudàaca wía yéewanápiná wáalimáca wapáchiacuéca pía mesúnamáita. <sup>12</sup>Wasutá Wáiwacali íicha pirípinacué, imàacáanápinacué cáinináca piicáyacacawa cachàiníwanái mamáalàacata, càita nacái cáinináanápinacué piicáca áibanái wenàiwica canánama, càide iyúwa cáinináaná waicácuéca pía. <sup>13</sup>Càita nusutáca Wáiwacali íicha pirípinacué ichàiniadáanápinacué píiwitáise, yéewanápinacué mabáyawanáca Dios iicáca pía Wáiwacali Jesús yàanàacaalípiná macáita yàasunái mabáyawanéeyéi yáapichawa èeri imáalàapínacaalíwa. Báisíta, amén.

### La vida que agrada a Dios

**4** <sup>1</sup>Siucade píacué wéenánáica yeebáidéeyéica Jesucristo itàacái, wasutácué píicha wawàsi manuísíwata, wàalàacué pía nacái Wáiwacali Jesús inùmalicuise. Pìyacué machacàníiri iyú cachàiníwanái mamáalàacata casímiácaténacué Dios iicáca píiwitáise càide iyúwacué pidàbáanáté pìyaca péemìacacaitacué wéewáidaca pía.

<sup>2</sup>Péemìacatécué cayába yái tàacáisi wacàlidéericatécué pirí Wáiwacali Jesús inùmalicuise. <sup>3</sup>Dios iwàwacué pìyaca mabáyawanéeri iyú píibaidacaténacué abéerita irípiná. Càmita iwàwacué píimáca áiba yáapicha càimírica pinírísíwa, càimíchúa nacái píinusíwa. <sup>4</sup>Càita Dios iwàwacué pìyaca, yéewanápiná cawinácaalí asiali iwàwéerica icàsàacawa yáalimá yeedáca íríwa íinupináwa mabáyawanáwaca, ìyacaténá úapicha cáimiétaquéri iyú. <sup>5</sup>Aibanái wenàiwica càimíyéica yáalíawa Dios ìwali needáca inanái máinicáiná nawàwacáita naimáca náapicha meedá. Càmita báisí naicáyacacawa cáimiétaquéri iyú. Picácué pimàni càì. <sup>6</sup>Picácué nacái píimá áiba asiali íinu yáapicha, càita nacái áiba inanái iníri yáapicha. Pimànicaalícué càiri báawéeri áiba wenàiwica írì, yásí Wáiwacali yùuwichàidacué píawa manuísíwata, càide iyúwacué wàalàanáté pía cáimiétaquéri iyú. <sup>7</sup>Dios càmita imáida wía wamànínápiná wabáyawanáwa casaquéri iyú, néese imáidaca wía wàyacaténá mabáyawanéeri iyú, yéewanápiná wáibaidaca abéerita irípiná. <sup>8</sup>Yái tàacáisi nùalèericuéca iyú pía, càimírita meedá wenàiwica yàasu tàacáisi, néese Dios itàacáicani, íná cawinácaalí càimírica yeebáida yái tàacáisi, idéca yúucaca íichawa Dios, yái Dios ibànuèricuéca Espíritu Santo piwàwaliculé. Yái Espíritu Santo íipidená íimáanáquéi “Yái Mabáyawanéerica” íimáanáca, Espíritu yàanàacáinaté mabáyawanácaténá imànica wía.

<sup>9</sup>Quéwa càmita iwàwacutá nùalàacuéca pía cáinináanápínacué piicáyacacawa Dioscáiná idéca yéewáidacuéca pía càì, ínà nùalfacawa cáininácuéca piicáca áibanái yeebáidéeyéica Jesucristo itàacái. <sup>10</sup>Wáalfacawa cáininácuéca piicáca macáita wenàiwica yeebáidéeyéica Jesucristo itàacái iyéeyéica Macedonia yàasu cáli íinata. Quéwa wasutácué píicha wawàsi manuísíwata, píacué wéenánáica, cáinináanápínacué cachàiníwanái mamáalàacata piicáca macáita yeebáidéeyéica Jesucristo itàacái. <sup>11</sup>Píalimáidacué pìyacaténá matuíbanáiri iyú áibanái yáapícha. Píacué máiní pisutáida péemiawa áibanái yàasu tàacáisi íwali, néese píibaidacué picáapi iyúwa càide iyúwaté wàlànácué pía. <sup>12</sup>Píibaidacué cachàiníiri iyú yéewanápiná áibanái càmiíyéica yeebáida Jesucristo itàacái naicácuéca pía cáimiétaquéeri iyú, pidèniacaténácué nacái yái pimáapuèrica, ipíchanácué picutáca piyáapínáwa áibanái íícha.

### El regreso del Señor

<sup>13</sup>Píacué wéenánáica, wawàwacué píalífacawa càinácaalí nàyanápiná níara yéetéeyéimicawa yeebáidéeyéicaté Jesucristo itàacái achúmacáichacué piwàwa manuísíwata càide iyúwa achúmáaná èeri minaná iwàwa càmiíyéica yeebáida Jesucristo itàacái. Achúmaca nawàwa manuísíwata càmicáiná nacúa néenánáimi imichàacawa yéetácáisi íícha. <sup>14</sup>Wadéca weebáidaca Jesús iináwaná íwali yéetácátéwa, néese imichàacaté nacáíwa yéetácáisi íícha. Càita nacái weebáidaca Dios imichàidáanápíná yéetéeyéimiwa yéetácáisi íícha, níái yéetéeyéimicawa yeebáidéeyéicaté Jesús itàacái. Nacáucami yàanàapíná Jesús yáapícha namichàacaténáwa yéetácáisi íícha Jesús yàanàapínácaalí àniwa.

<sup>15</sup>Iná wacàlidacué pírí yái tàacáisi càide iyúwa Wáiwacali yéewáidáaná wía: Wía cáuyéicáwaca mamáalàacata cháì èeri irícu Wáiwacali yàanàacaalípiná, càmita wàawa napíchalé chènuniré níái yéetéeyéimicawa yeebáidéeyéicaté Jesucristo itàacái. <sup>16</sup>Wéemiápiná chènuníiséri tàacáisi imáidéerica wía cachàiníiri iyú, yá ángel íiwacalíná imáidapíná nacái wíawa, yá nacái Dios yàasu trompeta casànapíná wéemiawa napuliacaalíni. Yásí Wáiwacali iricùapínáwa chènunibàata. Néese níái yéetéeyéimicawa yeebáidéeyéicaté Cristo itàacái, níata idàbapíná icáucàacawa quéechacáwa. <sup>17</sup>Néese wía cáuyéicáwaca wamichàapínácaawa náapíchawa cáuli irículé, wawàlùacaténáwa acalèe yèewiré wáipunitáidacaténá Wáiwacaliwa capíraléeri cáli íinatalé. Càipíná wàyaca Wáiwacali yáapíchawa càiripínáta. <sup>18</sup>Iná

pichàiniadacué piwàwawáaca iyú yái tàacáisi cayábéerica ipíchanacué máiní achúmaca piwàwa péenánái yéetácaalíwa pícha.

**5** <sup>1</sup>Píacué nuénánáica yeebáidéeyéica Jesucristo itàacái, càmitacué iwàwacutá nutànàaca pírí tàacáisi ìwali yái Wáiwacali yéenáiwánaca yàanàacatáipináta, càisimalénácaalí camuí ìya wapíchalé. <sup>2</sup>Píalíacuéwa cayába canáca èeri mìnánái yáaliériwa càicaalínápinácaalí Wáiwacali yàanàaca àniwa. Càide iyúwa cayéedéeri yàanàacaalí táiyápi càmicatáita wenàiwicanái íináidawa ìwali, càita nacái Wáiwacali yàapináwa néese àniwa càmicatáita èeri mìnánái icùa yàanàaca. <sup>3</sup>Néenalípiná wenàiwica nacàlidapiná càì: “Cayába macáita. Canáca ùwicái. Wàyaca matuíbanáita”, càipiná náimaca. Néese ráunamáita yùuwichàacáisi yàanàapinácawa nàwali cáiwíiri iyú imáalàidacaténá nía, càide iyúwa inánái idàbacaalí yùuwichàacawa isicúasíwata umusúadacaténá iicá èeri. Yásí càmita náalimá napiacawa Dios yàasu yùuwichàacáisi íicha. <sup>4</sup>Quéwa píacué wéenánáica càmitacué catá píiwitáise, píalíacáinácuéwa Dios ìwali. Iná càmitacué Wáiwacali yéenáiwáná icalùada píawa, yàanàapinácaalí càide iyúwa cayéedéeri icalùadacaalí wenàiwica. <sup>5</sup>Amalácáinácué píiwitáise macáita, píalíacáinácuéwa Dios ìwali, picùacáinácué nacái Wáiwacali yàanàaca. Càmita wàya càide iyúwa catéeyéi íiwitáise iyáaná, càimíyéica yáalía Dios ìwali. <sup>6</sup>Iná iwàwacutá wamichàidaca wáiwitáisewa wacùanápiná Wáiwacali yàanàaca. Picácué wàya iyúwa iiméeyéi meedá, càimíyéica icùa Jesús yàanàanápiná. Yá waicáidacué Wáiwacali ípunitawa cáalíacáiri iyú, wacùacaténá wíawawa ipíchaná wawènúadaca wáiwitáisewa Wáiwacali íichawa. <sup>7</sup>Aibanái catéeyéica íiwitáise càmita náalíwawa Dios ìwali. Càica níade iyúwa wenàiwica iiméeyéica meedá táiyápinama, iyúwa nacái wenàiwica icàméeyéica catéeri írìcu. <sup>8</sup>Quéwa wía amaléeyéica íiwitáise, icuèyéica nacái Wáiwacali yàanàanápiná, iwàwacutá wacùaca wíawawa cayába ipíchaná wamànica wabáyawanáwa. Iwàwacutá weebáidaca Jesucristo itàacái, càita nacái cáininácué waicáyacacawa, càita nacái manuícué wáináida wawàwawa Jesucristo ìwali iwasàanápiná wíawa Dios yàasu yùuwichàacáisi íicha. Wamànicaalí càì, yásí wacùapiná wíawawa cayába Satanás íicha ipíchaná wamànica wabáyawanáwa, càide iyúwa úwisàiri ìwalicaalí icàyuwaniwa, ibàle nacáiwa dàaléeri hierro nacáiri icùacaténá yáawawa yùuwidenái íichawa. <sup>9</sup>Dioscáiná càmitatè yeedá wía yàasunáipináwa imàacáanápiná yàasu manuírì yùuwichàacáisi yàanàaca wàwali, néese idéca yeedáca wía iwasàacaténá wía yàasu yùuwichàacáisi íichawa ìwalíise yái Wáiwacali Jesucristo



yéetáanácawa wáichawalíná. <sup>10</sup>Jesucristo yéetácatéwa wáichawalíná wàyacaténá yáapicha càiripináta, éwita nacái wéetácaalíwa, càita nacái cáucaalícáwa wía áiba èeriwa Jesucristo yàpinácaalíwa néese àniwa. <sup>11</sup>Iná pimichàidacué píiwitáisewáaca mamáalàacata, pichàiniadacué nacái piwàwawáaca càide iyúwa pimàníinácué piacawa siùcade.

### Pablo aconseja a los hermanos

<sup>12</sup>Píacué wéenánáica wasutácué píicha wawàsi manuísíwata, piacué ancianonái fimiétacaná, níái íibaidéeyéica Dios irípiná pèewibàa, nacùacaténácué pía, nàalàacaténácué pía Wáiwacali itàacái iyú, piacué yeebáidéeyéica Jesucristo itàacái. <sup>13</sup>Iwàwacutácué piaca ancianonái fimiétacaná, cáininácué nacái piicáca nía manuísíwata ìwalíse yái íibaidacalésica namànírica Dios irípiná, yái nacùanácuéca pía. Piyacué matuíbanáita piapichawáaca.

<sup>14</sup>Wachùuliacué pía, piacué wéenánáica, piàlàacué cachàiniíri iyú níara péená càmfíyéica iwàwa íibaidaca. Pichàiniadacué nawàwa nacái cawinácaalí achúméeyéica íináida iwàwawa, nàuwichàacái ìwalísewa. Piyúudàacué nacái níara machawàaquéeyéica íiwitáise, càmfíyécáwaca yeebáida tàì íiméeri iyú. Pimànicué macáita irí éeréeri iyú mamáalàacata.

<sup>15</sup>Aibanáicaalí imànicué pírí báawéeri, picácué pimàni irí báawéeri nacái píipuináwa, néese píalimáidacué pimànica cayábéeri piríwáaca càiripináta, macái wenàiwica irí nacái.

<sup>16</sup>Cayábacué piwàwa càiripináta. <sup>17</sup>Pisutácué píawawa Dios íicha mamáalàacata. <sup>18</sup>Píacué Dios irí cayábéeri càinácaalícué piyáaná, càicáinácué Dios iwàwa pimànica, piacué yeebáidéeyéica Cristo Jesús itàacái.

<sup>19</sup>Càide iyúwa càmicaalí wachacàida cayábéeri quichái iyúudèrica wía, càita nacái picácué pímaalàida píichawa yái cayábéerica Espíritu Santo imàníricuéca piwàwalícuíse. <sup>20</sup>Píacué caná iwèni piicáca natàacái níái wenàiwica Espíritu Santo ichàiniadéeyéica nacàlidacaténá tàacáisi Dios inùmaliícuíse. <sup>21</sup>Quéwa píináidacuéwa cáalífacáiri iyú ìwali macái tàacáisi péemièricuéca píalífacaténácuéwa asáisi báisícaalí Dios itàacáicani, néese peebáidacué abéerita yái cayábéeri tàacáisica. <sup>22</sup>Piwènúacuéwa macái báawéeri íiwitáaná íicha.

<sup>23</sup>Wasutáca Dios íicha pirípinácué, yái Dios matuíbanáirica imànica wáiwitáise, masacàanápínacué imànica píiwitáise píibaidacaténácué abéerita Dios irípiná, icùanápinácué nacái píiwitáise manuísíwata,

piwàwa nacái, piiná nacái mabáyawanéeri iyú àta Wáiwacali Jesucristo yàanàacataléta àniwa. <sup>24</sup>Càipiná Dios imànicuéca piríni. Yái Dios imáidéericatécué pía yàasunáicaténácué pía, imànipinácué pirí macáita càide iyúwa icàlidáanácué piríni.

### Saludos y bendición final

<sup>25</sup>Píacué wéenánáica, pisutácué Dios ícha walípiná nacái. <sup>26</sup>Pitàidacué cayábéeri iyú macáita wenàiwica yeebáidéeyéica Jesucristo itàacái. <sup>27</sup>Nuchùliacué pía Wáiwacali inùmaliçuíse, piléecué yái nùasu cuyàlutaca nálí macáita níara yeebáidéeyéica Jesucristo itàacái. <sup>28</sup>Yá wasutáca Wáiwacali Jesucristo ícha pirípinácué, imànínápinácué pirí cayábéeri mawènfiri iyú.

